

UNTUK SIARAN SEGERA



**KENYATAAN MEDIA
KEMENTERIAN PENDIDIKAN**

**KPM MENJUNJUNG TITAH KDYMM SERI PADUKA BAGINDA YANG
DIPERTUAN AGONG SULTAN IBRAHIM UNTUK MEMBENDUNG SALAH
LAKU BULI DI INSTITUSI PENDIDIKAN**

Kementerian Pendidikan (KPM) merafak sembah menjunjung kasih atas Titah Kebawah Duli Yang Maha Mulia (KDYMM) Seri Paduka Baginda Yang di-Pertuan Agong Sultan Ibrahim Ibni Almarhum Sultan Iskandar berhubung keperluan untuk membendung salah laku buli di semua institusi pendidikan bawah kelolaannya.

Titah KDYMM Seri Paduka Baginda Yang di-Pertuan Agong Sultan Ibrahim menjadi peringatan kepada seluruh warga KPM untuk menangani salah laku buli yang memberi implikasi negatif kepada seluruh masyarakat dan negara.

KPM menjunjung titah KDYMM Seri Paduka Baginda Yang di-Pertuan Agong Sultan Ibrahim untuk melaksanakan kempen anti-buli secara menyeluruh di semua institusi pendidikan bawah kelolaannya bermula di peringkat sekolah rendah. Ini termasuk dengan memberi kesedaran dan memupuk sikap untuk saling menghormati antara satu sama lain. Nilai hormat, disiplin dan kasih sayang akan diterapkan dalam diri setiap murid.

Pelaksanaan kempen ini akan dilakukan dengan kerjasama rentas kementerian bagi memastikan impak dan keberkesanannya. Kebersamaan semua pihak adalah dituntut dalam memerangi salah laku buli. Adalah menjadi tanggungjawab kita bersama untuk membentuk generasi masa hadapan yang cemerlang dengan nilai dan akhlak mulia.

Pada waktu ini KPM sedang merangka Kurikulum Persekolahan 2027 yang memberi tumpuan kepada aspek pendidikan karakter. Ia merangkumi pembinaan nilai-nilai manusiawi untuk melahirkan insan yang beradab, berakhlak dan berintegriti.

TAMAT

**KEMENTERIAN PENDIDIKAN
18 OGOS 2025**